

Fundacion lanta papiamento a mira luz cuatro aña pasa

ORANJESTAD-- Fundacion Lanta Papiamento (FLP) a mira luz cuatro aña pasa na mei 2009. A lansa e Fundacion cu e meta fundamental pa conscientisa nos pueblo Arubiano den un sentido amplio tocante identidad y balor di Papiamento. Den su trayectorio cortico, pero consciente y dirigi riba e obhetivo ey, FLP a bin ta realiza un variedad di actividad educativo y cultural relaciona cu, entre otro, investigacion y presentacion linguistico y literario, evento literario, acto di homenahe y concurso di ortografia.

Fundacion Lanta Papiamento (FLP), manteniendo su dinamismo y e esfuersonan cu e ta desplegando pa medio di un serie di actividad continuo, y inspira actualmente na un manera particular pa nos Aña di Papiamento y pa su principio fundamental di promove conocimiento di nos lenga nacional, awor tin proyecta, den e cuadra ey, un actividad linguistico educativo cu un caracter mas popular y mas didactico. E siguiente actividad cu FLP lo ofrece lo tuma luga diasabra dia 19 di october venidero

na Instituto Pedagogico Arubano (IPA). E programa di e dia ey lo consisti principalmente di les di Papiamento pa tur persona interesa. E personanan interesa aki mester ta persona cu nunca no a haya les di Papiamento ainda. E les mes lo contene dos materia: un les di gramatica y un les di ortografia. E programa di les tin ademas un quiz -o sea un serie di tarea- tocante e dos materianan duna. E lesnan ta na nivel elemental. Lo cera e programa cu dunamento di un certificado na tur e participantenan. E docentenan en-

carga cu e dunamento di les ta docente suficiente mente cualifica y ta dispone di suficiente experiencia cu docencia di Papiamento.

E idea tras di e les publico aki ta, fuera di promove conocimiento di Papiamento, pa despues (yuda) organisa of promove organisacion di curso completo di Papiamento (na diferente nivel) pa nos comunidad. E programa lo brinda e participantenan tambe un lunch di cortesia y e lesnan mes tambe lo ta completamente gratis.

Fundacion Lanta Papiamen-

to cordialmente kier invita tur persona interesa pa cera conoci cu e dos aspectonan menciona di Papiamento, pa inscribi via e-mail na ramon-todd@setarnet.aw pa mas tarda dia 10 di october pa nan por participa na e Les Publico di Papiamento. Henter e programa di Les di Papiamento lo tuma luga na Instituto Pedagogico Arubano (IPA) na San Nicolas, diasabra dia 19 di october venidero, entre 10'or di mainta y 3'or di atardi. Es nan cu inscribi y wordo acepta lo ricibi via e-mail un programa di e dia. □